

7

DISSERTATIO MEDICA  
INAUGURALIS,  
DE  
HAEMOPTOE:

QUAM,  
ANNUENTE SUMMO NUMINE,

EX

Amplissimi SENATUS ACADEMICI auctoritate et consensu,

Ac Nobilissimae FACULTATIS MEDICAE decreto;

PRO GRADU DOCTORATUS,

SUMMISQUE IN MEDICINA HONORIBUS ET PRIVILEGIIS  
RITE AC LEGITIME CONSEQUENDIS,  
ERUDITORUM EXAMINI SUBJICIT

JOANNES BERKELEY, ANGLOS.

Ad diem 10 Augusti, hora locoque solitis.

EDINBURGI:

Apud HAMILTON, BALFOUR, et NEILL,  
ACADEMIAE TYPOGRAPHOS.

MDCCLXII.

Digitized by the Internet Archive  
in 2019 with funding from  
Wellcome Library

<https://archive.org/details/b30786526>

# DISSERTATIO MEDICA,

D E

## HAEMOPTOE.

**H**AEMOPTOE dicitur, sanguinis rutili plerumque et spumantis, a laesis pulmonum vasis, evacuatio. Gravis frequens, et saepe lethalis morbus, praecipue in his septentrionalibus regionibus, ubi varium et mutabile semper coelum, omnes pulmonum affectiones, plerumque reddit graviores. Quae de causa, et quia egregii qui de hoc morbo scripserunt viri, de ejus indole et curatione multum inter se dissenserunt; hoc ex celeberrimae Academiae legibus institutum tentamen, ejus investigationi dicamus.

PULMONUM fabricam et usum, uti satis notum, praetermittimus; et primo, historiam morbi tradituri, ab haereditaria in morbum dispositione incipiemus; de illa postea corpo-

A

ris



ris conformatione, quae in hunc prae caeteris morbum disponit, et de tempore ejus invasioni maxime obnoxio, paucis dicemus. Sequuntur post haec causae, et modus quo suos edunt effectus, et symptomata quae inde sequi solent, simul et ea, quae ab aliis morbis haemoptoen distinguunt. Posthaec prognosis, pro variis mali causis, variisque symptomatibus, varia: Quam denique excipit mendendi methodus.

Haereditaria dispositio.

HAEMOPTOE ab haereditaria saepe diathesi oritur; id quod non tantum in hoc morbo contingit, sed et in epilepsia, mania, scrophula, podagra, multisque aliis. Verum an fermento cuidam, certa aetate, fluida inquinaturo sit tribuendum; an potius malae solidarum partium formationi, causis externis ansam praebenti; non nostrum est judicare. At quid variae corporis conformationes in morbis inducendis possint, monstrant, frequentiores in infantia capitis affectiones, circa pubertates annos, capite acmen adeptis, haemorrhagiae narium, et, uti postea demonstrabimus, circa tertium septenarium, frequens haemoptoe. Et quum externarum partium similitudinem

similitudinem a parentibus ad liberos transmitti, quotidiana doceat experientia, dubium non est, quin cum similitudine internarum, transmitti possit in haemoptoen praedispositio. Accedit ad haec, quod infantes, qui affecti parentis similitudinem, in externo corpore maxime prae se ferunt, in eisdem morbos procliviores, optimi observaverint clinici.

OMNES autem huic morbo maxime obnoxii sunt homines, quibus angustum aut male conformatum pectus, pulmonum dilatationi resistit. Hinc gibbosi et distorti plerumque in eum prae caeteris proni; humeri quoque elati, difficile enim respirantium est corporis positio, et pectoris angustiam significant. His optimi adjunxerunt observatores, candidos colore amaeno roseo, cute pellucida et caeruleis oculis, hilares, subtiles, praecocis ingenii: Quique cholericis temperamenti, vasa habent ampliora, et strictiorem corporis habitum: Quibus frequentes in juventute haemorrhagiae, quibus extremitates justo minores vel membrum aliquod truncatum: In iram et impatientiam proclives, quibus

Quae corpora.



bus pulsus celerius micat. Adultos quoque praecipue adoritur; mares magis quam foeminas: Hae enim, qua aetate acmen attingunt, a superabundante sanguine catameniis liberantur. Adde, quod dum costarum elevatione magis quam descensu diaphragmatis respirent, a quibusdam haemoptoes causis minus afficiantur; ab iis scilicet quae septi transversi descensum impediendo agunt. Quae vero foeminae, pathematibus hysteriis obnoxiae, mensium fluxum sub atrocibus spasmodis patiuntur; uti et viri hypochondriaca passione laborantes, in hanc affectionem frequenter incidere solent.

Qua ae-  
tate inci-  
dat.

EA aetate frequentissime accedit haemoptoe, qua corpus acmen adeptum, ulteriori solidorum extensioni magis resistit; fluidis interim, eadem ut antea proportionem, augeri perseverantibus; dum rigidiora solida contenta magis constringunt, et coarctata in corporis superficie vasa, perspirationem minuunt. BOERHAAVIUS HIPPOCRATEM sequutus, aetatem, ab anno decimo sexto ad trigessimum sextum, huic morbo maxime obnoxiam statuit. Alii ad quadragessimum extendunt.

tendunt. Alii, accuratius forte, inter annum decimum octavum, et vigesimum quintum, saepissime accidere contendunt. Sunt qui, ab anno vigesimo quinto ad trigesimum quintum, a desinente corporis incremento, haemorrhagias frequentiores observarunt. Qui strictiore sunt corporis habitu, maxime in juventute; qui autem laxo, spongioso, sanguineo, per omnem saepe aetatem, visitantur.

OMNIBUS anni tempestatibus contingit; Anni tempestas.  
sed iis praecipue, quibus maximae frigoris et caloris sese excipiunt vicissitudines: Omnium autem frequentissime, quum calor vernalis, rarefacti sanguinis impetum per constricta priori frigore vasa, accelerat. Adeo ut, mense Februario, et circa aequinoctium, haud raro anniversarium et quasi popularem, viderit HOFFMANNUS. Quid autem censendum de haemoptoe, omni novilunio redeunte, cujus memorat clarissimus MEAD?

CAUSAS habet omnes consuetas evacuationes Causae.  
sanguineas suppressas; five naturales fuerint excretiones, five subtractiones artificiales: Vi-  
tam



tam fedentariam cum lautiore vivendi consuetudine; infarctum aut obstructum viscus sanguineum; aut in ipsis pulmonibus, tubercula, schirros, ulcera, erosiones; polypofas in corde vel majoribus vasorum ramis, concretiones; omnes denique vasorum majorum obstructiones, et quicquid rarefactionem sanguinis inducere valeat, ut cibi acriores, potus spirituosi, corporis vel animi motus inordinati, calores nimii, balnea, etc. Eodem etiam spectant omnis violentior in tollendis oneribus et in puerperio nifus, tubarum validae inflationes, clamores, et in graviore tuffe vehemens pulmonum exagitatio.

QUAMVIS plethora five boni et purpurei sanguinis abundantia, inter haemoptoes causas vix numerari poterit, quum tali gaudentes sanguine, uti ruricolae exercitati, minime ea infestentur; medicorum tamen observatione compertum est, sanguineos, otiosos, sanguine seroso abundantes, accidentibus aliis causis, eam saepissime pati. Denique, quidquid sanguinem majori impetu et copia, in vasa pulmonalia determinare valet. Hinc primaria, et forte necessaria, haemoptoes causa, est spasmodica vasorum, aut in abdomine



abdomine, aut in remotioribus corporis partibus, strictura; qua liber sanguinis circulus, coarctatis alibi meatibus, intercipitur; et in alias partes ubi minor datur resistantia, impellitur: Hinc corpus, sed praecipue pedes, frigori expositi, et animi pathemata, praecipue timor, multum in haemoptoe excitanda possunt.

SANGUINIS eruptionem, a causis internis inductam, praecedunt ea quae spasmodicam stricturam testantur, signa. In cute horripilatio; in extremis, et maxime in pedibus, frigoris sensus; dolor in dorso, lassitudo et gravitas artuum; borborygmi, flatulentiae, et adstricta alvus; undulatorius, cum gravitatis sensu, in imo pectore motus; cum virium languore, et nauseabunda circa ventriculum anxietate; pectoris angustia et stimulo ad tussim. Sequitur falsus in ore sapor, et pruriens secundum asperae arteriae tractum titillatio, et tandem, fere sine tussi, exit sanguis floridus coccineus spumans, cum strepitu pulmonis, anhelitu, pulsu celeri, molli, undoso. Haec autem omnia, non omnibus contingunt.

Quibus ita  
gruit sympto-  
matibus.

SUPPRESSA

Quibus re-  
crudescit  
symptom.

SUPPRESSA iisdem fere recrudescent symptomatibus. Nonnunquam, superveniente febrae, per paroxysmos invadit. Saepe enim, ait WAGNERUS, cum oscitatione et pandiculatione, plerumque sub vesperam, supervenit febris, intermittentem plane referens, cum frigore febrili et summis praecordiorum angustiiis, a determinato versus interiora sanguine; calore febrili et nova subsequente haemorrhagia, adeo ut febris paroxysmos comitentur sanguinis eruptiones. Bis die, hora scilicet quarta matutina et nona vespertina, cum febre redeuntem vidit HOFFMANNUS. Hoc autem ex eo oriri videtur, quod constrictis febrili frigore exterioribus corporis, renovetur fluidorum versus pulmones determinatio.

Symptomata quae  
sequuntur.

SANGUINIS fluxum sequitur plerumque, anxietatis, et circa pectus oppressionis, ab exoneratis jam vasis, levamen: Urget autem tussis, pro ratione loci affecti saevior; si ab aspera arteria fluat sanguis, vix sensibilis: Si vero ab ultimis vesiculis, parva quamvis prodeat quantitate, tussis frequens erit, profunda et molestissima: Et quo profundiora  
rupta



rupta fuerint, vasa, eo semper molestior propter difficiliorem extravasati sanguinis ejectionem; hinc sequitur somni defectus.

CESSANTE sanguinis fluxu, magna aliquando evacuatur pituitae viscidae copia, per easdem vias, propter manentem humorum erga pectus determinationem, nimiamque membranae bronchiorum glandulosae relaxationem.

DIXIMUS jam, quae corpora, qua aetate, invadat morbus, qua grassetur tempestate, causas unde originem trahat, quibus ingruat, quibus recrudescat, et excipiatur symptomatibus. Liceat nunc paucis de proximis ejus causis, earumque operatione differere.

PROXIMAE omnes haemoptoes causae a sola obstructione originem trahunt, quae vel auctae fluidorum quantitati debetur, vel vasorum capacitati imminutae: Quaerendum ergo est, quid has solidorum vel fluidorum mutationes inducat, et quomodo hae in haemoptoe excitanda agant.

ET hic prima occurrit investiganda, singularis illa, et in corpore praeeexistens in hunc morbum diathesis; quam vocat celeberrimus

A mala corporis conformatione.



MUS BOERHAAVIUS “temperiem illam  
 “qua verget in haemoptoen.” Haec prae-  
 cipuam sedem in mala corporis conforma-  
 tione habere judicamus ; five naturalis haec  
 fuerit, et a parentibus tradita pectoris an-  
 gustia ; five accidentalis curvatura et distor-  
 tio. Nam compressi undique angusto tho-  
 race pulmones, necessaria dilatatione et in-  
 cremento impeditis, sanguinem per venam  
 pulmonalem transmittere nequeunt ; unde  
 obstructions, et ramorum arteriae pulmona-  
 lis minorum aneurismaticae distensiones ;  
 et, accedente causa externa, faciles ruptu-  
 rae.

Determi-  
 natio ad  
 pulmones.

HUNC etiam in bene formato pectore  
 praestant effectum, multae, quae aequabilem  
 sanguinis circulationem turbant, causae. Sic  
 obstructus lien aut hepar, distenta flatibus in-  
 testina, constricta spasmis inferiorum par-  
 tium vasa, sinistri cordis ventriculi evacua-  
 tionem impediunt ; hinc impedita venae  
 pulmonalis depletionem, sanguine implentur ad  
 crepaturam usque pulmones. Concretiones  
 quoque polyposae in aorta eosdem praestant  
 effectus ; vel si in majoribus arteriae pulmona-

lis

lis ramis fuerint, hos obstruendo, majorem sanguinis copiam, majori impetu, per caeteros apertos devertunt: Pari ac in hydraulicis machinis ratione, ubi obstructis aliquibus canalibus, fluida per caeteros apertos, majori impetu ire coguntur; venae interim, quae in pulmone, alia quam per reliquum corpus ratione, arterias correspondentes, luminum magnitudine, non exaequant, laterali quoque distentarum arteriarum compressione obstructae, sanguinem reducere nequeunt.

ALIAM numeravimus haemoptoes causam, corporis scilicet incrementum. Eo enim tempore, quo corporis ad acmen appropinquantis incrementum insigniter diminutum est, manente eadem vi aëmapoetica, omnia corporis vasa, sanguine quam maxime distendi necessario debent; et a sublata, fluida inter et solida nostra, proportionem, saepe pendere haemorrhagias confirmari videtur, exemplo infantum, quorum capita, habita ad reliquum corpus ratione, justo majora sunt, sic uti oportebat, ut sensuum organa citius ad maturitatem pervenirent. Hi, sub secundo septenario, cum plethora incipit ad systema vergere

Corporis  
incrementum.



vergere arteriosum, et caput acmen adeptum ulteriori incremento resistit, narium haemorrhagiis maxime sunt obnoxii: Adde, quod cum crescente corpore, crescat in contenta fluida solidorum compressio; unde in male formatum pulmonem urgetur plethora, ea lege, qua compressa undique fluida, qua minima datur resistantia, ire coguntur.

Ob eam  
obstruc-  
tam.

EODEM pertinet, tubulorum, materiam insensibilis perspirationis in corporis superficie excernentium, coarctatio, quod sub id tempus, ab aucto solidorum elatere, contingit. Multo vero magis a suscepto frigore, a gravi terrore, vel ab alia quavis causa, oriunda spasmodica externarum partium constrictio. His enim non solum minuitur perspiratio Sanctoriana, verum inducitur fluidorum versus interiora determinatio, ut probant renovati, ab aëre frigido corpori applicato, menstruorum fluxus, aucta ab eadem causa urinae secretio, alvique dejectiones.

Obrestit  
autem san-  
guinem.

SUPPRESSAE evacuationes sanguineae, ab omnibus fere observationum medicarum scriptoribus, inter haemoptoes causas recensentur. Tendit enim natura, fluidorum jac-  
turam



turam, five in necessariis vitae functionibus fuerint consumpta, five praeternaturali evacuatione deperdita, reparare. Hinc post frequentiores sanguinis excretiones, accedit quasi quaedam naturae consuetudo, sanguinis majorem copiam generandi, quam vitae functionibus sit necessaria; inde, haud magno temporis intervallo, cessantibus his evacuationibus, nimia fit sanguinis copia, ad accessum causarum externarum in praedisposito corpore, per vasa pulmonalia cito erupturi. Par ratione fit, quod extremitatis inferioris amputationem fere nunquam non sequatur, in homine adulto forti et vegeto, haemorrhoidum fluxus: Immo summae experientiae in arte viri, in femoris amputatione, non nisi post earum accessum, prognosin formare ausi sunt. In haemoptoe, ab hac causa, sanguis saepius per dilatata extrema arteriolarum oscula, quam per rupta vasa, excerni creditur.

## DIAGNOSIS.

## D I A G N O S I S.

A sputo  
cruento.

QUAE sit consueta morbi facies, ex praegressis colligi potest. Reliquum est igitur, ut veram pulmonum haemorrhagiam, ab aliis sanguinis per os excretionibus, distinguamus; et primo a cruentis illis sputis, quae ex interiori faucium, gurgulionis et narium ductu, scrautu potius quam tussi ejiciuntur: Differt in eo, quod haec parciora sint, et muco obscuro sanguine striato, potius quam sincero et spumante sanguine, constant. Adde, quod in hoc casu, capitis aliarumque partium affectarum levamen, unde ducant originem, demonstret.

ALIQUANDO destructum inflammatione jecinoris parenchima, per concretum peritoneum et septum transversum, fistuloso ulcere in pulmonum substantiam, se insinuat, et per asperam arteriam, cum tussi, forma sputi rubro-nigricantis et spumosi, eliminatur; ab haemoptoe autem, praegressis symptomatibus, et consistentia vini oleive foeces referente, distinguitur.

SPUTUM

SPUTUM illud cruentum, quod primis pleuritidis vel peripneumoniae diebus excerni solet, ab iis glandulis provenit, quae unctuosum, ad asperae arteriae superficiem lubricandam, humorem exsudent : Harum enim oscula uti in catarrho contracta, humorem tantum serosum, sic demum relaxata, aliquando perexiguam sanguinis quantitatem pituita permixtam transmittunt ; tale etiam sputum sine ullis pleuritidis vel peripneumoniae symptomatibus, uti et sine ullo haemoptoes phthiseosve periculo, pluribus mensibus mane et vespere redeuntem vidit WILLISIUS. Hic autem mucus parva sanguinis quantitate striatus, facilem praebet distinctionem.

A sputo  
pleuritico.

SANGUIS, qui a ventriculo prodit, crassus, venosus, nigricans, nunquam spumosus ; cum nausea et anxio conatu, vomitu ejicitur, citra tussim, nisi ea casu inter vomendum excitetur.

A vomitu  
cruento.

## PROGNOSIS.



## P R O G N O S I S.

VARIAT admodum, pro varietate causarum, corporum, aetatum, aëris, et comitantium symptomatum, in hoc morbo prognosis: De cuius difficultate sic divus medicinae parens: “ Qui sputo cruento detinentur, ex his quidam  
 “ brevi tempore intereunt, quidam diutius  
 “ trahunt; praestat enim aetas aetati, corpus  
 “ corpori, et affectio affectioni, anni tem-  
 “ pestas tempestati in qua aegrotant: Qui-  
 “ dam enim morbos facile tolerant, quidam  
 “ omnino tolerare nequeunt.” HIPPOCRATES. § 10. Omnium autem haemorrhagiarum hanc periculosissimam pronunciare non dubitamus: Verum quum a causarum vel symptomatum saevitia judicanda sit, prout his stipata, examinanda occurrit: Et primo uti simpliciter a causa externa.

A causa  
externa.

HAEMOPTOE a causa externa, si inter tri-  
 duum compescatur sanguinis fluxus, sanationem non respuit; nec tamen periculo vacat. Pulmo enim in motu respiratorio ad vitam necessario perpetuo versatus, vasorum conso-  
 lidationem

lidationem difficile patitur: Verum pati posse, probant magna pulmonum vulnera feliciter sanata. In hoc casu multum ab aetate, a temperamento, a vasorum ruptorum magnitudine, et a sanguinis extravasati rejectione pendeat: Senes, debiles, laxi, aegrius servantur.

A CAUSIS etiam internis, modo nulla adfit in morbum a male formato pectore diathesis, nec a prius affectis pulmonibus originem trahat, non necessario terminatur in phthisim: Verum, sublatis causis, veluti quae a causa externa, oriunda judicatur.

A causa interna.

QUAE a suppressis solummodo evacuationibus sanguineis provenit haemoptoe, non a ruptis pulmonum vasis, sed plerumque a dilatatis arteriolarum vaporem in bronchiorum cavum exhalantium osculis, oriri creditur: Et, modo recta adhibeatur vivendi medendique methodus, haud difficilis est sanationis. Hujusmodi haemoptoen periculi omnino expertem, singulis mensibus redeuntem vidisse testatur HOFFMANNUS, in gravidis cessantibus menstruis, et in virginibus,

A suppressa evacuatione sanguinea.

C

quae



quae parcius justo tributum solvebant lunare.

Si a febre libera.

IN hoc morbi gradu, post debitum diaetae et medicamentorum regimen, (modo nulla superveniat febris) facilis plerumque sequitur sanatio, et sanatus raro recrudescit, vel in phthisin terminatur; verum aeger paulatim, sicuti post alias haemorrhagias, sanitatem et vires recuperat. Phthisis enim quae haemoptoen sequi solet, originem suam, non tam ab exilis vasis dehiscencia, ait MORTONUS, quam a statu sanguinis inordinato et hectico ducere videtur.

Cum diathesi.

VERUM ubi a diathesi haemoptoica morbus originem duxit, in summo semper mortis phthiseosve periculo versatur aeger. Quum enim causa primae productioni sufficiens, in corpore remaneat, vix ulla arte praecavebitur renovatio, postquam jam rupta vasa faciliorem sanguini exitum conciliaverunt.

Cum dolore et tussi.

Quo gravior circa pectus dolor, quo vehementior et profundior tussis, quo difficilior respiratio, eo semper plus imminet periculi. Ubi Haemoptoen praecessit tussis sicca, et ea sanata remansit, praegressam phthiseos causam,



sam, tuberculum scilicet vel catarrhum, significat. Melior post haemoptoen tussis magna cum expectoratione, quam parva, sicca, praesertim si sputa mucosae uniformiter sanguine permixta constent. Sputa nigra, vel aquae, quae caro recens abluta fuerat similia, gangraenum et mortem; purulenta phthisim, designant.

Quo saepius sopita recrudescit haemoptoe; Saepe  
recrude-  
scens. eo semper magis fiet in recidivam prona. Per quas enim sanguis semel et iterum eruperit vias, eas facillime postea relegit; accedit enim quasi quaedam naturae consuetudo, vel solidorum dispositio, quae appulso validius sanguini facile viam concedunt: Adeo ut post infidas inducias aegro saepe inopinato superveniat.

OMNIUM vero in haemoptoe symptomatum, Cum febre. pessimi semper ominis est febris lenta, hectica; quae praesente nihil unquam boni praesagiendum, absente vero, nihil non sperandum.

HAEMOPTOE symptomata, praecipue variolis, nephritidi, cachexiae superveniens, semper lethalis: Et nisi intra triduum compescatur

pesceatur sanguinis fluxus, semper multum imminet periculi.

In mor-  
tem tran-  
sit.

MORTIS aliquando causa est simplex sanguinis jactura, quam imminere saepe praefagit insultus epilepticus, huic morbo superveniens semper lethalis: Saltem si largae praecefferint venaesectiones. Nonnunquam, extravasati sanguinis copia pulmones obruens, deficientibus ad ejus expulsionem viribus, respirationem intercipiendo necat.

Transit in  
aliud mor-  
bum.

Non semper vasorum pulmonalium rupturam sequitur phthisis; siquidem nec semper haemorrhagiam excipit suppuratio, ut in narium haemorrhagiis et in haemorrhoidibus satis liquet. Sic haemoptoe, a suppressis solitis evacuationibus sanguineis orta, modo totus ejiciatur extravasatus sanguis, omni phthiſeos periculo vacabit. An ideo concludendum, phthisim, non a sola nasci vasorum ruptura, sed cum ipsa haemoptoe communem habere originem tubercula scilicet vel pulmonum obstructions? Videtur id confirmari ex eo, quod haemoptoe raro admodum sit primum phthiſeos symptoma; sed post manifestum jam catarrhum vel tubercu-

luni



lum accedere soleat. Verum si extravasatus sanguis non totus ejiciatur, id quod saepe contingit, quoties in ultimis bronchiorum cellulis vasa rumpuntur; aut si actione aeris inter respirandum in eas urgeatur, aut vires ad ejiciendum defuerint, facile sequitur phthisis. Nam crassescens sanguis putredinem concipit, tubercula ingignit, unde vomicae, vel ingentes oriuntur exulcerationes; immo gangraena inducitur: Adeo ut ipsa sphacelata pulmonum substantia, forma sputi nigricantis porosi, lienis cocti speciem referentis, prodeat, cum sanie aquae, qua recens caro abluta fuerat, simillima.

### METHODUS MEDENDI.

HAEMOPTOES curationem suscipienti quatuor occurrunt indicationes curatoriae; scilicet,

*1mo*, NIMIAM sanguinis abundantiam tollere;

*2do*, EJUS impetum in vasa pulmonalia minuere;

*3tio*,



3tio, FLUIDORUM versus pectus et pulmones determinationem avertere ;

POSTREMO, vasa pulmonum laxa roborare.

QUOD ad primam attinet. Plethora tollitur imprimis venaesectione ; quae, ubi inflammationem testatur crusta phlogistica, sit copiosa : Topicae enim inflammationes parcâ non tolluntur, uti in pleuritide, ophthalmia, &c. satis liquet. Verum ubi inflammatoriae diatheseos signa minus manifesta habentur, parvae et saepius repetitae, plus levaminis, cum minori virium jactura, afferre solent. Si autem debilitatae aegri vires, circulationi in extremis sustinendae vix sufficiant, omnis sanguinis missio nocebit.

HUIC quoque indicationi accommodata est diaeta parca ; quae sit ex lacte et facilis digestionis vegetabilibus : Haec enim minus calefacientia, et minorem febris gradum inter digerendum excitare solent.

IMPETUM sanguinis in vasa pulmonalia minuere. Huic quoque indicationi conducunt, quae supra memoravimus, remedia ; quibus adjungatur aquae gelidae ingurgitatio. Acida, tam vegetabilia, quam ex fossili

fili regno parata, inordinatum sanguinis motum compescunt; sicut etiam nitrosa, et alia quaedam neutra. Nitrosa tamen, parva quamvis usurpantur quantitate, bronchiorum mucum stimulo quodam inquinando, molestant tussim aliquando excitant. Quare parcum salis Glauberi usum, ad semidrachmam scilicet de die, praeferendum putamus.

ARTUUM ligaturae, dum reditum sanguinis per venam cavam in cor dextrum impediunt, ejus impetum et copiam in arteria pulmonali minuunt. Verum si ab arteriis bronchialibus fuerit haemorrhagia, ligaturas, aortae systema implendo, nocere judicamus. Nec si ab arteria pulmonali fluxerit sanguis, diuturnum auxilium adferre possunt. Nam impedito per venas reditu, sanguis venosus arteriarum depletioni resistit, unde cito ad sinistrum cordis ventriculum, et inde per venam pulmonalem ad pulmones usque propagatur obstructio. Adeo ut, propter parvam auxilii stabilitatem, et vanos quos aegro saepe incutiunt timores, non, nisi summum a sanguinis jactura immineat periculum, usurpandas censemus.

Hic



Hic summopere vitanda acria et stimulantia quaecunque, et quae sanguinis intestinum motum et rarefactionem inducere possunt. Inter haec sunt opiata, quae raro sine summo periculo in haemoptoe usurpantur. Quamvis enim sanguinem in corpore circumstantem, ab iis neque coagulari neque attenuari, concedimus, quoscunque in eum extra corpus ediderint effectus; tamen sanguinis rarefactioni et orgasmo favere, et inflammatoriam ejus diathesin augere, contendimus. Et si spasmorum relaxationi prodesse potuerint, multo magis nocebunt, supprimendo tussim, qua sola, extravasatus in bronchiorum ramis cellulisque aëreis sanguis, exantlari possit. At ubi nullum ab inflammatoria diathesi instat periculum, et humores acres catarrhales, bronchia stimulando, summa cum aegri vexatione, continuam fere excitaverunt tussim, prudens eorum usus concedi potest. Conciliato enim blando sopore, aegri vires reficiuntur, et acres bronchiorum humores, stagnando mitescunt.

NIMIUS



NIMIUS etiam corporis calor et motus caute evitandus est. Ipsa equitatio, dum manet sanguinis sputum, semper nociva.

SANGUINIS ad pulmones determinationem avertere.

SANGUINIS versus pulmones determinationem, magna ex parte, a spasmodica vasorum strictura, oriri demonstravimus: Harum ergo relaxationi imprimis elaborandum est: Hic egregium praestant effectum pediluvia; si non sanguinem versus inferiora derivando, saltem mira, qua praedita sunt, in spasmis relaxandis virtute: Haec autem non soli calori tribuenda est, sed potius blandae, qua nervos afficiunt, sensationi: Balnea enim arenae calidae eosdem nequeunt praestare effectus. Quae ex horum usu oriri potuerit sanguinis rarefactio, praegressis venae sectionibus, praecavetur. Huc quoque conducunt salia neutra, praecipue ex acido vegetabili et alcalino volatili praeparata. Summopere interim evitanda cutis ab externo frigore constrictio.

SOLITAE evacuationes sanguineae suppressae, debitis remediis revocandae sunt: Sic in

Nosocomio regio saepe sanatam vidimus Haemoptoen, quae a suppresso mensium fluxu originem duxerat, solo pillularum mercurialium usu.

UTRUM rite procedant evacuationes naturales videndum est. Lenis alvi subductio non solum sanguinis orgasmum temperat, sed et versus inferiora determinando, a pulmonibus avertit. Alöetica autem, quum virtute quadam califaciente praedita haemorrhagiis favcant, usurpari nequeunt. Salia quaedam neutra citam et copiosam afferunt dejectionem, sed non adeo felix eorum usus in alvi relaxatione inducenda; adeo ut nullum in hoc casu aptius detur remedium, quam flores sulphuris; quae, dum calefaciente alöeticorum qualitate carent, aequè certum cum iis habent in alvo solvenda effectum.

URINAE secretio augetur aquae potu; cui immisceri potest sal Glauberi, paulo majori quantitate, quam ad diaphoresin excitandam requiratur; minori vero, quam quae alvum ducat.

SI post infidas inducias recrudescat malum, cum febre statis temporibus et per paroxismos



paroxismos redeunte, horripilatione, externarum partium strictura, et febrili frigore comitante, ad corticem Peruvianum confugiendum est, uti primus docuit MORTONUS.

VERUM ubi producti nimium paroxysmi, se invicem excipientes, tempus corticis exhibitioni opportunum non concedunt; omnis phthiseos praecavendae spes in eo sita est, ut, sublato febrili spasmo, redeat cum determinatione ad exteriora, a febre intermissio; huc conducunt remedia emetica dicta, ea saltem dosi propinata, qua nauseam tantum inducere valent. His enim remediis magis, quam aliis omnibus, relaxatur cutis constrictio, et a singulari ventriculum inter et reliquum corpus consensu, fit versus exteriora derivatio. Immo fortasse solida roborando, hiantia vasorum ora constringunt; et hinc bonos a cl. ROBINSON observatos emeticorum in haemoptoe effectus ortos opinamur.

AVERTIT etiam a pulmonibus inflammatoriam diathesin, externa epispasticorum et vesicantium applicatio; quae, quo propius loco affecto fuerint applicata, eo certius et citius



citius suum praestabunt effectum. Praecavenda autem, venaesectionis et refrigerantium usu, quae ab eorum stimulo oriri possint, mala. Tardior fonticulorum actio melius in prophylaxin, quam in praesentis morbi medelam, convenire videtur.

VASA pulmonum laxa roborare.

Hic tandem in usum veniunt adstringentia et styptica: His enim conciliatur solidis fibris robur, quo urgentis sanguinis impetui magis resistent, et spasmodicis affectionibus minus fiant obnoxii. In hunc finem usurpari posse remedia Saturnina, suadere videntur, nonnulla ex his conflata, et a gravissimis viris laudata, remedia.

VERUM quum haec perniciosissimos etiam in corpus humanum edere effectus quotidiana doceat experientia, tanquam venena non satis notae efficaciae evitanda censemus. Astringentia Martialia, quamvis humano corpori Saturninis longe minus inimica, non nisi cum cautela et parca copia, in hoc morbo usurpari possunt. Eorum dosin hominibus monstrare ipsa natura videtur, ait cl. MEAD, parca ea copia, quam aquis chalybeatis mineralibus admiscuit

admiscuit. Neque ulla forte feliciori forma exhibentur, quam qua, illa in plurimis ex his aquis mineralibus subministrat. Et quod ex eorum usu frequens oriatur haemorrhoidum fluxus, non ab excitatis communibus haemorrhagiarum causis pendere videtur, sed ab inducta, incauto eorum usu, nimia constipatione.

MARTIALIUM usui adjungi potest, adstringentium vegetabilium. Multarum autem, quae hac classe recensentur, plantarum fatis incertae sunt operationes. Cortex autem Peruvianus in hoc casu longe prae caeteris eligendus est: Et vel solus, vel Martialibus nuptus, primarium in hac indicatione efficit remedium.

INTERDUM etiam accidit, scilicet ubi a sola vasorum relaxatione processerit malum, ut etiam ab initio exhibita adstringentia fortiora, sanguinis fluxum sine periculo fistant.

SUBLATO sputo cruento et pectoris oppressione, convalescenti jam aegro concedi potest corporis exercitium. Hoc primo saltem sit lenissimum, vectio scilicet in navi vel rheda, et postea equitatio. Coeli quoque convenit



convenit mutatio; male autem sub aestivis ardoribus mittitur aeger in meridionales plagas, ubi nimius calor sanguinem rarefaciendo, plus mali, quam brumale septentrionalium regionum frigus, afferre solet; melius ii, qui aestatem nobiscum, hiemem autem sub calidiore sole, peragi jubent.

HAEC quam potuimus brevissime, ne ultra quam solitum est, hujus tentaminis moles extenderetur, de haemoptoe ejusque curatione diximus; et si qua minus accurate, minus recte dicta occurrant, uti parcat his studii nostri praemitiis benevolus lector, rogamus: Quum nec ex longo initum de haemoptoe scribendi consilium, auctorum sententias comparandi digerendique copiam fecerit, nec optatum ejus elaborationi tempus, res nostrae concesserint. Dolendum etiam nobis multum fuit, quod illustrissimi Baronis VAN SWIETEN, unde tanta lux medicinae affulsit, in hunc morbum commentaria, praelo quamvis excussa, ad nos nondum pervenerint.

F I N I S.





